

# DOMENIE VI DI PASCHE

## Jutoris pe Liturgjie

Domenie, ai 21 di Mai dal 2017

*Continuant la leture dai Ats dai apuestui, o vignìn a savê che, dopo dal martiri di Scjefìn copât a clapadadis, si discjadenà une grande persecuzion cuintri de glesie di Gjerusalem e si sparniçarin ducj pes campagnis de Gjudee e de Samarie fûr che i apuestui (cf. At 7, 58; 8, 1). Par chest motif te leture di vuê o cjatìn il diacun Filip in Samarie tal mieç di une int considerade eretiche e pôc di bon e che invezi si jere vierzude a la peraule di Diu. Il contrari dai timps che o stin vivint, li che lis glesiis dai nestrîs paîs a son simpri plui vueitis.*

*Al è di just domandâsi: - Cemût mai? Ce stiaial sucedint? - e fasìn ancje, come cristians, il mea culpa cence cjariâ di colpîs i timps e i indiferents.*

*De glesie di Samarie si lei che Pieri e Zuan alore a lerin jù e a prearin par lôr par che a cjapassin il don dal Spirtu Sant. Il Spirtu Sant al è il Spirt inviât dal Pari e che al rint la comunitât adate a continuâ l'opare di Gjesù tal mont.*

*Dulà e cemût ricognossi l'azion dal Spirtu Sant tes nestrîs comunitâts? Parcè che Gjesù tal vanzeli nus vise che ancje vuê il Pari us darà un altri Confuartadôr. E alore, cemût lis glesiis si svueidino? Al è ce rifleti e ce preâ.*

*Ma scoltìn ce che la liturgjie di vuê nus dîs.*

### Antifone di jentrade

cf. Is 48,20

**C**un vòs di gjonde contait e fasêtlu savê;  
fasêtlu rivâ fint ai ultins confîns de tiere:  
il Signôr al à liberât il so popul, aleluia.  
**Si dîs** Glorie a Diu.

### Colete

Diu onipotent, danus di celebrâ cun cûr e passion  
chestis zornadis di gjonde in onôr di Crist resurît,  
par podê mostrâ in ogni moment de nestre vite  
ce ch'ò stin fasint memorie.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE

At 8,5-8.14-17

**Ur meterin lis mans sul cjâf e lôr a cjaparin il Spirtu Sant.**

*Duncje in Samarie a son rivâts il diacun Filip e i doi apuestui Pieri e Zuan. Nol è pôc, al è tant.*

*Ma par dâ vite a une gnove glesie chescj trê no bastin. Tâl e cuâl in zornade di vuê: pe vitalitât des nestrîs comunitâts di paîs no bastin ni lis tradizions, ni i catechiscj, ni i diacuns, ni il predi, ni il vescul, ni pape Francesc. Di fat, Pieri e Jacum a prearin par chei di Samarie, par che a cjapassin il don dal Spirtu Sant.*

*Al è il Spirtu Sant che al da vite a une comunitât che e je fate di ducj, ma prime di dut dai puars tal spirt, chei ch'a vain, chei ch'a son bogns di cûr, dai perseguitâts, dai furtunâts seont lis beatitudinis vivudis e proclamadis di Gjesù (Mt 5, 1-12). Cun chestis personis e dome cun lôr il Spirtu Sant al darà vite a lis nestrîs piçulis comunitâts.*

### Dai Ats dai Apuestui

In chei dîs, Filip, lât jù intune citât de Samarie, ur predicjave il Crist. La int si butave a pleton daûr di lui, parcè che a sintivin a fevelâ dai spiêi ch'al faseve o che ju viodevin di persone. Dai

umign ch'a jerin lambicâts dai spirts soçs, a saltavin fûr i demonis petant grancj berlis. E aneje une vore di pidimentâts e di strupiâts a derin di ca. E e fo grande gjonde in chê citât.

Tal fratimp i apuestui, vignûts a savê a Gjerusalem che la Samarie si jere vierzude a la peraule di Diu, a mandarin Pieri e Zuan.

Alore a lerin jù e a prearin par lôr, par che a cjapassin il don dal Spirtu Sant, che nol jere ancjemòno vignût jù parsore di nissun. A jerin dome stâts batiâts tal non dal Signôr Gjesù. Alore Pieri e Zuan ur meterin lis mans sul cjâf e a cjaparin il Spirtu Sant.

Peraule di Diu.

## SALM RESPONSORIÂL

dal Salm 65

*Il salm si lu cjate tal Salteri al numar 66 e al vignive proclamât cun ogni probabilitât in cualchi solenitât dal templi di Gjerusalem cuant che a fasevin memorie des grandis oparis di Diu, in mût particular de liberazion de sclavitut e dai socors ricevûts tes grandis calamitâts che no mancjavin mai.*

*Tal timp di Pasche il ringraziament al va pe resurezion di Crist dai muarts e pal don dal Spirtu Sant anime des nestrîs comunitâts cuant che si dan dongje te peraule di Gjesù.*

### **R. Grandis a son lis voris dal Signôr.**

*Se cjantât: Il cjant dai salms responsoriâi, p. 45.*

**O ben:**

### **R. Aleluia, aleluia, aleluia.**

Cjantait a Diu di dute la tiere,  
dal so non cjantait la glorie;  
dait sflandôr a la sô laude.

Disêt a Diu: «Cetant bielîs ch' a son lis tôs voris! **R.**

Denant di te si plee dute la tiere  
e ti cjante a ti, al to non e cjante».

Sù mo, cjalait i spetacui di Diu:  
il so mût di fâ cui fis dai umign  
ch'al è une robone. **R.**

Al à tramudât il mâr in tiere ferme,  
il flum lu an passât a pît.

Sù mo, in lui fasìn fieste!

Cu la sô potence al comande in eterno. **R.**

Su mo, scoltait, vualtris ch'o rispétais Diu,  
parcè che o vœi contâus ce che lui al à fat pe mê vite.

Benedet seial Diu, che nol à rifudade la mê preiere  
e no mi à dineât il so boncûr. **R.**

## SECONDE LETURE

1 P 3,15-18

**Fat murî seont la cjar, ma tornât vîf seont il spirt.**

*L'anime nestre, lis nestrîs comunitâts no an dibisugne di zonta sacri a sacralitât, ma pluitost di praticâ une spiritualitât semplice, umane, te vite di ogni dì. Al è ce che s. Pieri al racomande cuant che nus dîs: pronts - cun biel trat - cun rispiet - cuntune cussience a puest - cun buine condote - e savint patî fasint il ben.*

### **De prime letare di san Pieri apuestul**

Benedets, adorait il Signôr Crist tai vuestris cûrs, pronts a rispuindiur a ducj chei che us domandin reson de vuestre sperance. O vês di fâlu però cun biel trat e cun rispiet, cuntune cussience a puest,

parcè che tal moment stes che si maligne di vualtris a restin vergognâts chei ch'a disin mâl de vuestre buine condote in Crist. Di fat al è miei, se Diu al vûl cussì, patî fasint il ben che no fasint il mâl.

Ancje Crist al è muart une volte par simpri pai vuestris pecjâts, lui just pai no juscj, par tornâus a menâ a Diu; fat murî seont la cjar ma tornât vîf seont il spirt.

Peraule di Diu.

### CJANT AL VANZELI

Zn 14,23

R. Aleluia, aleluia.

Se un mi vûl ben, al metarà in pratiche la mê peraule, al dîs il Signôr, e gno Pari i volarà ben e li di lui o vignarin a stâ.

R. Aleluia.

### VANZELI

Zn 14,15-21

O prearai il Pari e lui us darà un altri Confuartadôr.

*Al è il discors dai salûts de ultime cene. Il Signôr al partîs; intant che nus salude, nus lasse dome un comandament: di cjala al a sô vite di pelegrin pes stradis de Galilee e a ce che i è sucedût a Gjerusalem.*

*A chescj siei dissepui lui ur impromet: jo o prearai il Pari e lui us darà un altri Confuartadôr, di mût ch'al sedi simpri cun vualtris. Par une comunitât no coventin grandis robis: al baste cognossi simpri plui in profunditât la peraule dal vanzeli e servî il prossim sui esemplis di Gjesù. Fasint cussì lui al darà il Spirt di veretât e la comunitât e deventarà sâl e lûs tal paîs (Cfr. Mt 5, 13-16).*

### Dal vanzeli seont Zuan

In chê volte, Gjesù al disè ai siei dissepui: «Se mi volês ben, o metarês in pratiche i miei comandaments. E jo o prearai il Pari e lui us darà un altri Confuartadôr, di mût ch'al sedi simpri cun vualtris, il Spirt di veretât che il mont nol pues acetâlu parcè che no lu viôt e no lu cognòs. Vualtris lu cognossês parcè che al è a stâ cun vualtris e al sarà in vualtris. No us lassarai vuarfins, o tornarai di vualtris. Ancjemò par pôc e il mont no mi viodarà plui, ma vualtris mi viodarês parcè che jo o vîf e vualtris o vivarês. In chê di o ricognossarês che jo o soi tal Pari e vualtris in me e jo in vualtris. Chel ch'al à i miei comandaments e ju met in pratiche, chel mi vûl ben. Chel che mi vûl ben, i volarà ben ancje gno Pari e jo i volarai ben a lui e mi palesarai a lui».

Peraule dal Signôr.

Si dîs O crôt.

### Su lis ufiertis

Ch'a rivin fin li di te, Signôr,  
lis nestrîs preieris dutune cu lis ufiertis,  
in mût che, smondeâts midiant de tô gracie,  
o sedin plui disponûts ai misteris dal to grant bonvolê.  
Par Crist nestrî Signôr.

### Antifone a la comunion Zn 14,15-16

Se mi volês ben, o metarês in pratiche i miei comandaments,  
al dîs il Signôr.

Jo o prearai il Pari e lui us darà un altri Confuartadôr,  
di mût ch'al sedi cun vualtris par simpri, aleluia.

### Daspò de comunion

Diu onipotent e eterni,  
che cu la resurezion di Crist tu nus ricreis pe vite eterne,  
fâs cressi in nô i benefizis dal sacrament di Pasche

e rinforce i nestris cûrs cun cheste mangjative di salvece.  
Par Crist nestri Signôr.

\* \* \*

### **Riflession** di pre Antoni Beline: **Confuartâsi te veretât**

Dut il timp dopo Pasche, il timp de ligrie e de vitorie, al è travanât di chest spirt di malincunie, di cheste ligrie intime e par nuie sunsurose che la clime stesse dal cenacul e lis peraulis di Crist a ti fasin vivi. O lein chescj tocs cussì umans, cussì bieî, cuant che il Crist sflandorôs al è za che al baline ator pe Galilee e che al prepare la sô gloriose jentrade in cîl...

*Vanseli par un popul, an A, p. 104*

\* \* \*

### **Cjants pal timp di Pasche**

- Crist nus da la sô lûs, *n. 158*;
- Victimae paschali laudes, *n. 159*;
- I cristians a cjantin laude, *n. 160*;
- Aleluia... O filii et filiae, *n. 161*;
- Sta legre, sante Glesie, *n. 162*;
- Christ ist erstanden, *n. 163*;
- Crist al è in vite, *n. 164*;
- Cristo risusciti, *n. 165*;
- Grosser Gott, *n. 166*;
- Al Agnel sacrificât, *n. 167*;
- Hvala veçnemu Bogu, *n. 168*;
- Te lodiamo Trinità, *n. 169*;
- Laudate Dominum *n. 170*;
- O sin resurîts a la vite, *n. 171*;
- Benedete la zornade, *n. 172*;
- Il nestri Redentôr, *n. 173*;
- Si cjanti al Pari laut in cîl, *n. 174*;
- Nei cieli un grido risuonò, *n. 175*;
- O Cristo, soldi Pasqua, *n. 176*.

**Salm 22** : Il Signôr al è il gno pastôr, *n. 241*;

“ **94** : Vignît, batìn lis mans al Signôr, *n. 256*;

“ **80** : Gjoldêt in Diu nestre fuarce, *n. 256*;

“ **92** : Il Signôr al regne, *n. 258*;

“ **97** : Cjantait al Signôr une cjante gnove, *n. 261*;

“ **113a** : Cuant che Israel dal Egjit al è jessût, *n. 265*;

“ **113b** : No a nô, Signôr, no a nô, ma al to non dai glorie, *n. 266*.

**Tal libri Hosanna**, si puedin cjatâ ancjemò altris cjants e salms adats al timp di Pasche.

\* \* \*

*Crist al è in vite, je la muart disfate:  
stin legrîs pe sperance, che Gjesù nus puarte. Kyrie eleison.  
Se nol fos in vite, amare sort la nestre,  
ma da l'ore ch'al è vîf, ch'al vadi il laut al Pari in cîl.*

\* \* \*

- \* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- \* *Il cjant dai salms resposoriâi, Ed. Glesie Furlane, 2012.*
- \* *50 corâi de cristianitât todescje voltâts par furlan, ed. Glesie Furlane, 2016.*
- \* *Il libri des riflessions sul Vanzeli al è: pre Antoni Beline, Vanzeli par un popul, an A, Ed. Arti Grafiche Friulane.*
- \* *Par domandâ chescj libris scrîvêt a [info@glesiefurlane.org](mailto:info@glesiefurlane.org)*